



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Assim Madibo nem asaya pongu
atema tenokdangba agütsü

Iran rara mechi Trump aser
Republican senator asatep



VOL. XXIII ISSUE NO. 253 (ADOK 253) DIMAPUR ROGONÜ (FRIDAY) AAMI (JUNE) 26, 2026

₹ 5.00

Linük nung commercial LPG supply soita aliba salar

Dimapur, Aami/June 25 (TYO): Domestic cooking gas peria agütsütsü mechi West Asia nung mepetmesü aliba ajanga commercial LPG supply nokdanga aliba Union Ministry of Petroleum and Natural Gas-i agentsüogo.

States aser Union territories indang chief secretaries ajunga dangi osang ka yokba nung, non-domestic (commercial) packed liquefied petroleum gas (LPG) supply nung tenokdangba agüja aliba ajunga agiena mepetmesü metenzükdang ama supplies agütsütsü, ta ministry ajanga ashi.

Kibong nung domestic LPG peria agütsütsü mechi commercial LPG supplies aziüoka liasü.

Ministry-isa bulk LPG supplies nung tenokdangba agüja

aliba salatsüogo, anungji mepetmesü metenzükdang aliba shilem 50 tashi supply agütsütsü melar.

Parnoki Oil Marketing Companies (OMCs) tem dang maneni OMCs asem nung commercial aser industrial consumers indang database ka kuma amshitsü totuyuba agütsü. Commercial aser bulk consumers shirnok Piped Natural Gas (PNG) dangi melenogo, parnok PNG nungsa alitsü ta ministry-i ashi.

Consumers shirnoki PNG amshir aser local PNG networks dangi melentsü inyaktepba mapang lir, parnoka teti atema totzü dangi melentetsü.

City Gas Distribution entities den teka amteper maneni PNG dangi melendaktsütsü OMCs nem totuyuba agütsü.

Dimapur nung African Swine Fever puteta lir

Dimapur, Aami/June 25 (TYO): Dimapur yimti kübok Thahekhu Block-7 nung aliba ak tem dak African Swine Fever (ASF) putetba sülen District Administration, Dimapur ajanga iba tesem ya Infected Zone ta sangdongogo.

Deputy Commissioner, Dimapur, Dr. Tinojongshi Chang, NCS-i sangdong ka agütsüba nung, Thahelhu Block-7 nung aliba ak tem dak ASF tejangja laboratory ajanga jangjaogo ta Chief Veterinary Officer, Dimapur nungi osang aruogo, ta ashi.

ASF ya kanga mela menatepa aoba tashidak ka lir, anungji iba tashidak tali prokshia aoba nokdangtsü mera tekeraba nung agitsü nüngdaker, anungji administration-i Thahekhu Block-7 aser kongshia aliba tesem tem ya Infected Zone sangdonger aser India sorkari ASF guidelines agüja aliba ama iba tashida aziüoktsü mera agitsü, ta metetdaktsü.

Tenokdangba nung shilem ka

ama Infected Zones nungi ak, ak chanu, ak shi, ak shi agi yangluba, ak chi, oset mesüra tashidak alitsüsa osettsüset tem bener madoktsü mesüra bener maotsü.

Chief Veterinary Officer nem surveillance, sample collection, disinfection, nüngdakba tesem nung ak tepsetba aser protocol nung aliba ama mera agitsü totuyuba agütsüogo.

Superintendent of Police, Dimapur aser tim ketdangsürtem dang ozüing shidak amshitsü asoshi metetdaktsüogo.

Administration-i ak metsür, ayoker, abener aser tashidak wara agi kongshir aliba stakeholders ajunga dang Veterinary Department den amalitep akatsü aser mapang shia totuyuba agütsüba ajunga sülen anidaktsü ayongzüko.

District nung African Swine Fever tali prokshia aoba nungi jenbua alitsü mechi nisung ajak dang amalitep akatsü ajungshir, ta Dimapur District Administration ajangasa metetdaktsü.

Noney district nung IED apok, nisung asem yiru

Imphal, Aami/June 25 (Agencies): Manipur nung Noney district kübok Joujangtek yimtsüng nung Imphal-Khoupum lenmang anasa Brehostibar nikongdang bomb apokba lendong ka nung nisung asem yiru, aser par asem rongnung ana kanga sashia yirur lir.

Mejangjaba nisung temi rema yutsüba improvised explosive device (IED) ya anojungi poka iba lendong ya atalok.

Iba bomb aremtsü merangertem densema yiru, ta osang kar ajanga ashir. Yirur alir rongnung nisung ana - Helum aser Lemang - Churachandpur Medical College-i anir ao.

Iba lendong atalokba sülen Assam Rifles aser Manipur Police indang joint team ka iba tesemi arua liasü. Iba tatalokba bushisüngdang tenzüka lir.

Ibai region nung azüdokshi tali akumba nung tesüsaba lendong alitsü.

June 18 nü mejangjaba nisung temi kasa tesem nung alu inyaka alir dak injang khalokja liasü. Iba mapang yangji aluyimer ka teka aser teku nung injang agi yirua liasü.

June 18 nü iba lendong atalokba sülen yangji alirtem ain adoka anasa Old Cachar Road mokdanga parnok alu nung security meshia liasü.



Delhi Ao Senso Telongjem ketdangpuri Padma Shri Awardee Guru Sangyusang Pongener den Delhi nung pa anendak ajurutepba mapang tangokba noksa nung angur. Pa den mensem tatsüka amendang, Ao kin songjen nem tenüng tajung bener arutsüba asoshi tenüngsang agütsüba den ano maneni Aor sobaliba tajungtem wazüka aser rizünga ayutsü aser itemji lanuasenor nem angazükdaktsütsü asoshi DAST ketdangpuri tesayur taküm asoshi Tsüngrem dang temoatsü meshija liasü. (Mokokchung, 25th June, 2026)

State-i Pain and Palliative Care nung temulung agütsür

Dimapur, Aami/June 25 (TYO): National Programme for Palliative Care (NPPC) ajanga June 25, 2026 nü anogo asem asoshi Nurses aser Physiotherapists atema State level Training on Pain and Palliative Care sentong Conference Hall, Department of Health and Family Welfare, (DHFV) Kohima nung tenzüko.

Iba training ya Hospice & Palliative Care Specialist, AIIMS Delhi aser AIIMS Jodhpur nungi takotet nisungtem arua agütsür, kong nurses aser Physiotherapist 47 adener.

Mission Director NHM, Dr. Keveduyi Theyo-i okila jembidang, teintet rogotem tali akumba aser menatepa maoba tashidak aser menatepa aoba tashidak kar indang khuret tali akumba ajanga palliative care tali nüngdaka akumer ta ashi.

Item asoshi tashidak

anepaluba kisüng masü saka tekangshi suneptsüba, akhum agüja anepaluba aser kibong tem yariba nüngdaker.

Nagaland nung Palliative care programme ya 2017 nung tenzüka liasü aser iba sentong yagi ki o jen tashi itshitsü, capacity building, mozü peria anguba aser awareness agütsüba nung rangloker, ta Theyo-i ashi.

Comprehensive Primary Health Care (CPHC) nung Palliative care inoksemba ajanga services ulushia CHCs, PHCs aser HWCs, SCs nunga agütsür.

Palliative Care System tashi aittsü atema capacity building ya tongtired amai lir aser training shidak agir aliba workforce melira service delivery tajung masütsü, ta Mission Director-i ashi.

Shiranger aser healthcare professionals tsüngta Caregivers (kinunger, ASHAs, ANMs, community health

workers, aser trained volunteers) ya apular ama lir.

Palliative care nung caregivers atema arogo, lokti tentet balala shilem agidaktsüba ajanga nüburtem asoshi palliative care tajung agütsütetter, ta paisa ashi.

Hanife F Macgamwell, Hospice & Palliative Care Nurse Specialist ajanga iba sentong nung jembidang State dang pelaba lemsatep aser training agir ajunga tongtipang lir aser iba training ajanga nisung kar State Trainers akumtsü ta ashi.

Iba sentong nung Dr. Imnapokim, Jt. Director SPO (NPPC) menden liasü aser pai training nung adenertem pela agizüka liasü. Pai District representatives ajunga dang iba training nung temulung agüja adentsü aser NPPC kübok palliative care services agütsüba nung tashi itshitsüsa inyakttsü ayongzüka liasü.

Naga nunger nisung trok tepsetba atema Kuki Zo Council-i tatok meshir

Churachandpur, Aami/June 25 (Agencies): Naga nunger nisung trok pua bener oa tepsetba agizüka aser sasaba lemsatepa Kuki Zo Council (KZC) chairman Henlienthang Thanglet-i Brehostibarnü iba tatalokba atema tatok meshi aser Manipur nung kin balala tsüngta mepetmesü adoka aliba inyaksangshi ajunga indang-indanga bushisüngdangtsü ayongzüko.

Churachandpur district headquarters nung osangbener den jembidang, "Naga nunger civilian trok tepsetba nung Kuki-Zo nüburi aibelen tulu inyakba ni nangzüker. Ibai junga meshisadangi inyakba lir. Ni khukhua aitsür. Ni kanga jashir aser ozü nüburtem tenüng nung tatok meshir," ta Thanglet-i ashi.

KZC odongtar Ginza Vualzong-ia Naga nunger pua

bener oa aliba tepsetba, Kuki nunger civilian 14 tepsetba aser Kuki nunger yimtsüngtem rongdoktsüba densema mepetmesü ajunga ochi nung bushisüngdangtsü ayongzüka liasü.

Naga nunger nisung trok ya May 13 nü Kangpokpi district kübok Leilon Vaiphei yimtsüng nungi pua bener ao. Parnok tasügang ya June 10 nü Kuki-Zo yimtsüng ka anasa ngutet.

Kuki nunger lokti tentet balalai taküm February ita Kuki aser Naga nunger tsüngta mangatettep adokba sülen par kin nungi züngsem 14 tepsetogo aser ki aika rongdoktsüogo ta ashir.

Vualzong-i ano NSCN-IM aser Zeliangrong United Front (Kamson) densema telungpur telok temi civilian tem dak amakba asoshi mera tesashi agitsü akhang aser temulung


melemi alirtem jenoka aliba mesüra item mapa tamajung inyaktertem adokdaktsüba tesem bushisüngdangtsü ashi.

Security operations ya Kuki nunger aliba tesemtem kisüng nung shimshia agia arur, anungji ozüing mapa kuma inyakba ya kin telemsa makai indang-indanga yimya shidak amshia inyakttsüla, ta pai ashi.

Vualzong-i ano Naga nunger timba sür aliba tesemtem nung lenmang mokdanga aliba ajunga tanaben lapoktsü, healthcare services, chiyongtsü supplies, mozü, totzü aser tanga tongtipang osettsüset tem tetsükdaktsü majurui agitettsüsa mera agitsü ayongzüko.

"Administrative aser security inyakyim nung ochishia aser timtem nung aliba yimtsüngtem kumzüka yua nüburtemi tamang katettsüsa inyakttsüla," ta pai ashi.

SVAN-i ayongzüka awareness sentong ka agiogo



Dimapur, Aami/June 25 (TYO): Lendi nung yokyatsüyartem rongsenketzüng jenjang ajungkettsütsü atema scheme balala dak sendakba nung tangazükba agütsütsü aser Street Vendors (Protection of Livelihood and Regulation of Street Vending) Act, 2014 indang metetdaksütsü atema Street Vendors Association Nagaland (SVAN)-i awareness sentong ka ayongzüka agiogo.

Sentong nung o jembiba mapang SVAN geneal secretary Dr. Subonglemba Aier-i, vendor tem dang Dimapur Municipal Council nungi tenügdakba permit aser kuli kakat agizütsü ayongzüka liasü. "Onoki tashishiba aika agizüker, saka nenok ket nung kuli kakat tapet melira onoki kecha minyaktetsü," ta pai ashi.

Permit aser ID card shitak lira nenoki nenok temeden kanga junga amshitetsü, anungji nenok kuli kakat aser permits shitak bena lira nenok nem teyari agütsütsü atema onok asoshi tezübaba akümtsü, ta paisa shisem.

Nenoki temzüng ozüng shitak beshira temzüng ozüng nenok tsütsü asütsü. Nenoki ID card shitak bena lira police aser traffic department-ia nenok akümtsübütsü. Nenok poksüngtsü atema shishilemba balala inyaker, saka inyakyim shitak mebenteti ajaklen shishilemba minyaktetsü, ta Dr. Subonglemba-isa ashi.

Association-i, 'Vending Zones' tapet ka amenoktsü atema inyakdar. Vendors

Association, Police Commissioner, DC Dimapur, aser Municipal department nung ajak longjemer iba tesem mekazütsü atema jenjang agidar. Iba dak sendakba nung Municipal CEO tasenbaia jenjang tapet agidar, ta pai ashi.

Kasa mapang nung Dimapur Chamber of Commerce & Industry, vice president Shikuto Sema-i ashiba agi, Dimapur nung union aser welfare society aika lir, ajisüaka item lokti tentettem ya ita ishika dang lirbo temzüng ozüng nungi pila aoer aser tensa tamajungba akümer.

Nenoki State aser Central sorkar temzüng ozüng angatetsüla aser iba dak ajemdaker inyaksangshitsü nüngdaker. Nenok lenmang shitak nung dang ora Dimapur Chamber of Commerce-i nenok takokba tashi nongita yaritsü.

Tawa tanü rakzükrakdemba aser yokyatsüyartem merenshiba aika ajangashia arudar. Ibayongji union aser welfare society tashi tait ka alitsü nüngdaker. Nenok lenirtem nenok ajangzükdaksütsü atema renema lir. Nenok longjemer inyakra state aser central scheme balala ajanga tajangzüka aika angutsü. Sorkar-i teyari agütsüba sen lakh aika agitsü maongka aika lir, ta pai ashi.

Sentong nungsa SVAN tir Kughato Zhimomi-i, Dimapur nung lendi nung yokyatsüyär 15,000 dak tema lir. Parnok rongnung kar züngoksema lir aser timba mezüngoksema lir. Nisungtem aika tenüng junga mangaoka meyui lir, ta ashi.

Paisa, sorkar inyakyim nung lendi nung yokyatsüyär ka aninra, parnok nem Municipal mesüra 'Town Vending Committee' ajanga anogo 30 jilia osang agütsütsüla. Ibaji dang masü parnok manin tsüngda tanga tesem ka lemzüksütsü nüngdaker, ta ashi.

Nenok ket nung kuli kakat tapet lira nenoki rakzükrakdemba mesüra ozüng alema inyaksangshiba anema nokdaktetsü. Nenoki IPC Section 383 kübok rakzükrakdemba aser Section 270 kübok nenok merenshiba anema temzüng ozüng dak ajemdaker jenjang agitettsü, ta pai ashi.

Maneni BJP tir Shekisha Achumi-i, lendi nung yokyatsüyäba ya mapa tajung ka aser lendi nung yokyatsüyartemi oset aser service balala yoka pei poksüng aazütsü tangar den kasa temeden lir, ta ashi. Nenok nem ano sorkar mesüra lokti tentet mashi kati nüngdak makaba nung merenshiba mesüra amokmerenba nungi kümzüka alitsü atema temeden agüja lir. Lendi nung yokyatsüyartemi jelia osang magütsüi mesüra inyakyim shitak mebenoki tashiyim agi manintsüla, ta pai ashi.

Shishilembadak mesüra pei temeden aser maongka dak sendakba nung telemtetba agitsü asoshi nenok temeden lir. Iba den ano ketdangsürtem ket nungi kuli kakat mesüra license tem agizütsü nenok temeden lir, ta pai shisem.

GST ketdangsürtemi Kohima nung dokantem meita ao

Dimapur, Aami/June 26 (TYO): Saru shitak agütsüdaksütsü aser shishilemba merek mereka toktsütsü nükjidong nung Assistant Commissioner of State Taxes, Kohima Ward-B tetuyuba nung GST field ketdangsürtemi June 23 aser 24 nü yimti kübok commercial establishments tem meita aoba den inyakyim meshidakertem pua ogo.

Iba meita aoba sentong ya Nagaland Goods and Services Tax (NGST) Act, 2017 kübok Section 67 dak ajemdaker agia liasü.

Meita aoba mapang ketdangsürtemi züngoksema aliba shishilemba balalai NGST Act, 2017 kübok Section 31 nung tetuyuba agüja aliba ama customer tem nem tax invoices shitak agütsür magütsür aji asadanga liasü. Dokan kiburtem dang sales records, purchase invoices, stock registers, aser tanga tenügdakba kuli kakattem meshia asadanga liasü.

Ketdangsürtemisa, establishment temi GST returns file shitak asü masü aji asadanga liasü. Talisa, GST returns nung oset ayokba aser alizükba figure

ya shishilembartemi mangaoka aliba record den puteper meputeper aji asadanga liasü.

Iba den bendenloksema, account kakat aser GST record nung mangaoka aliba osettem ya shishilembadak aser godown nung aliba oset den puteper asü meputem aji asadanga liasü. Aibelen ngutetbatem ajak maneni bushisüngdang GST temzüng ozüng kübok jenjang tapet agitsü atema mangaoka yuogo.

Meita aoba mapang field ketdangsürtemi ken o maneni asadanga jenjang agitsü atema cash memo aser bill tem densema yokyatsüyäba dak sendakba nung kuli kakattem puogo.

Dokan kiburtem aser shishilembartem dang NGST Act, 2017 kübok Section 35 nung tetuyuba agüja aliba ama record shitak ayutsü, tsütatepba ajak atema tax invoices shitak agütsütsü aser temerenshi achitsü aliba nungi jenboa alitsü atema GST returns shitak file asütsü tetuyuba agütsüogo.

Maneni taruba hoptatem tsüngda Kohima kübok tanga tesemtem nunga meita aoba sentong benoka inyakttsü, ta ketdangsürtemisa metetdaksü.

Mangkolemba Sub-Division nung FFBs alizükogo



Dimapur, Aami/June 25 (TYO): Mangkolemba Sub-Division kübok oilpalm aluyimertem atema alizüng tasen ka tongteta oilpalm Fresh Fruit Bunches (FFBs) mezüngbuba shilem SDAO, Mangkolemba kübok Longho nung takok yokogo.

Iba inyakyim ajanga NMEO-OP kübok Department of Agriculture, Nagaland-i, oilpalm tsünütsü atema jenjang agiba takok ngua aoba sayur.

Maneni iba ajanga remunerative crop ka ama

oilpalm ajanga aluyimertem rongsen taliba aazütsü, aser linük nung tachitsü totzü agi manügdaksütsü atema nükjidong yur aliba nung teyari agütsür.

Ajak senteper local aluyimertem ket nungi oilpalm Fresh Fruit Bunches (FFBs) metric tonnes 3 Patanjali company-i Mahesh Pathak (State Head, Patanjali) aser SDAO, Mangkolemba nungi ketdangsürtem matsüngdang alizükogo.

Immunization Day atema Mon nung senden amen



Dimapur, Aami/June 26 (TYO): 2026 küm atema June 28 nü National Immunization Day (NID) Polio Round agitsü aliba asoshi Mon District Task Force senden ka June 25 nü ayongzüka menogo.

ADC Mon, Pakon Phom, NCS lenisüba nung iba senden amen, aser pai züngsem ajak dang team ka ama iba sentong nung shilem

agitsü ajungshi. Paisa, iba Polio Free mission takok atema medical team den teka amteper inyakttsü ayongzüka liasü.

Senden nungsa Vaccine Logistics & Cold Chain Manager, NHM, Mon, N Changlang Konyak-i, parnok inyakyim aser tasatem dak sendakba nung Power Point

Presentation ka agütsü. CMO, Mon, Dr. Supongmenla Walling aser lar team-i Human Papillomavirus (HPV) vaccine indang metetdaksü, aser ashiba agi, vaccine dak kecha lendong mali aser tashidak nungi jenboa alitsü atema iba vaccine yagi teyari tulu agütsür.

KiphireDC-i coordination senden ka ayongzüka

Dimapur, Aami/June 26 (TYO): Nagaland Angh-i July 5 nungi 10 tashi nung anütoklen aliba district tem aser Meluri District semdangtsü aliba dak sendakba nung Kiphire Deputy Commissioner-i office tekolaktem ajak senden ka ayongzüka. Iba senden ya June 26 nü 12:00 ako nungi tenzüka DPDB Hall, Kiphire nung amentsü.

Senden nung department tem renemshia aliba asadangtsü aser Angh-i district semdangba mapang maparen ajak takok ngua inyakttsü atema onük balala benoka sensak asemtsü.

Office tekolak ajak dang iba senden nung tamakok maludaktsüi adentsü metetdaksüogo. DC-isa,

department nungi representatives tem yokba khenyongi magizüktsü ta jangja jangja metetdaksüogo. Mepaitoktetba maparen kar kar lira DC nungi temelaba shitak agitsüla, ta kasa sangdong ajanga metetdaksü. Maneni department ajak dang department inyakyim, takoktem, tang tinyakdak aliba mapatem, tongtibang onüktem aser ken o dak sendaka aliba tanga inyakyimtem indang osang tejangja bener arutsü tetuyuba agütsüogo.

Angh-i district semdangba mapang asadangtsü asoshi department temi records, presentations, briefing note aser tanga kuli kakattem ajak update sür renema atatsü metetdaksüogo.



June 25, 2026 nü Raipur nung Congress MP, K C Venugopal-i osangbenertem den jembidang tangokba noksa nung angur.

Khalistani-i Air India tayimtsü nung bomb inoktsü: CSIS

New Delhi, Aami/June 25 (Agencies): Tesüiba küm 40 tsüingda tang mezüing Canadian Security Intelligence Service (CSIS)-i, Air India Flight 182 tayimtsü nung bomb inoka yutsüba nung Khalistani teloki shilem agi, ta nangzükogo.

1985 küm iba tatalokba nung nisung 329 asü.

Iba ya kiralongra mapa ka liasü, ta shia Canada nung intelligence agency CSIS-i Canada nung amenoka aliba Khalistani kiralongrartem nem tai tongloksü.

CSIS-i Facebook post ka ajanga, "Tanü National Day of Remembrance for Victims of

Terrorism anogomong nung kiralongra ajanga Air India Flight 182 tayimtsü nung nisung 329 asüba CSIS-i bilemteter. 1985 küm June 23 anogo nung Canada nung amenoka aliba Khalistani kiralongrartem bomb pokdaksüba ajanga tayimtsü poksa aser tayimtsü nung mena alirtem ajak asü; asürtemji teimbaka Canada nungertem liasü. Canada nung puti otsü nung kiralongra tamajungtibaji ibai liasü," ta metetdaksü.

Canada Ato kilonser Mark Carney-ia sangdong ka ajanga, "Küm 41 tejaklen tanü anogo nung bomb agi Air India Flight

182 tayimtsü poksatsüba ajanga tai maket nisung 329 asü aser parnok rongnung Canada nung 268 densema liasü. Canada nung puti otsü nung kiralongra tamajungtibaji ibai liasü," ta metetdaksü.

1985 küm June 23 nü 'Kanishka' ta ajaba Air India Flight 182 tayimtsü Montreal nungi London ajanga New Delhi-i aoba mapang nung khu nung miima inoka yutsüba bomb ji Ireland nung anünglen apok. Heathrow Airport nung tayimtsüji anentsü minute 45 dang lia bomb apokba lendong nung tayimtsü nung alir ajak asü.

Seychelles National Day sentong nung PM Modi adentsü

New Delhi, June 25 (Agencies): Ato kilonser Narendra Modi-i June 27-29 anogotem nung Seychelles semdangtsü, aser yangji asetkong linük küm 50 ajungba Jubilee sentong nung tetushi tejaoker ama adentsü.

Modi-i Seychelles Tir, Patrick Herminie den-a senden mena linük ana tsüingda tesendaktep tajungba akümstü atema jembitsü.

Brihostibarnü Ministry of External Affairs (MEA)-i sangdong ka ajanga, tesiüba küm 10 tsüingda Ato kilonseri tang mezüing Seychelles semdangtsü; 2015 küm nung pai iba linük semdanga liasü, ta metetdaksü.

India-i Vision Mahasagar (Mutual and Holistic

Advancement for Security and Growth Across Regions) nung ajemdaker Indian Ocean Region nung aliba linüktem den tesendaktep ano tajungba akümstü atema inyakba mapang nung Modi-i Seychelles semdangtsü.

Seychelles küm 50 ajungba National Day sentong nung India nung sepai contingent kati shilem agitsü aser Indian Navy rong ana amshitsü.

Modi aser Herminie nati tzüyim nung security, defence, terenlok tsütsü partnership, capacity building aser rongsenketzüing tsütsü taliba amalitepa inyaksü atema jembitsü. Lenir anatisa regional aser international onüktem nung o lemtepa den külemi Indian

Ocean Region tensa asadangtsü aser Global South nung aliba linüktem tsüingda amalitepa inyakba jenjang reprangshitsü.

Ato kilonser Modi-i National Assembly of Seychelles nunga o jembitsü aser yangji aliba India nungertema ajurutsü.

MEA-i sangdong ka ajanga, "Indian Ocean region nung tongtimbang kiyonger ka ama Seychelles ya India nung Vision Mahasagar kübok kanga tongtimbang linük ka aser Global South atema tongtimbang," ta metetdaksü.

Terenlok tsütsü partner ka ama India-i Seychelles nung infrastructure projects, tzüyim nung security, healthcare, shisaliok aser capacity building project nungita yarir.



June 25, 2026 nü New Delhi nung Delhi Development Authority (DDA)-i Yamuna Bazar area nung ali atsünga asüba kiojen bendoktsüba noksa nung angur.

Congress-i June 30 nü 'Chhatron Ki Goonj' campaign tenzüktsü

New Delhi, June 25 (Agencies): Congress-i June 30 nü 'Chhatron Ki Goonj' (Voice of Students) campaign tenzüktsü aser August 9 nü "Delhi Chalo" sentong agia tembangtsü, ta Brihostibarnü party nung lenir kati metetdaksü.

Iba campaign ya anogo 40 nü agitsü.

New Delhi nung osangbenertem den jembidang Congress lenir Satej Patil-i, exam balala nung ochimashi ajanga kaketshirtemi tamang mekatettsüsa kümogo aser kaketshirtem lakh aika tarutsü tia raksatsür, ta metetdaksü.

Maharashtra nungi MLA Patil-i, kaketshir lakh 23-i küm aika exam atema renema aruba sülen NEET tatidang agüja liasü, ajisüaka lakh 2-i dang medical, dental, AYUSH aser allied courses atema admission agitetla, ta ashi.

"Parnoki (sorkar) nütsüing crore 130 madak ketdangtsüba indang jembir, ajisüaka kaketshir lakh 23 atema tatidang-a junga ketdangtsüa magiteter," ta pai metetdaksü.

Taoba mapang Maharashtra nung minister inyaksangisa, iba ya paper leak asüba mesüra exam agishiba indang dang masü; iba ya ajanga kaketshirtemi inyakim nung tamang mekatettsüsa kümogo, ta metetdaksü.

Congress-i yimti 28 nung iba campagin agitsü, ta metetdaksü.

Iba sentong kübok party

nung lenirtemi kaket lema agütsütsü, lenmangtem nung senden ayongzükä agitsü aser campus outreach agitsü, ta pai metetdaksü.

Patil-i, paper leak asüba ya yimya ka kümadokogo saka sorkari tongti aibelenertem nem temerenshi magütsüteter, ta metetdaksü.

Congress-isa National Testing Agency (NTA) inyakim, exam ketdangtsüa agiba inyakim, question paper renemba, print asüba aser belenshiba inyakim ajak jungjunga bushisüingdangtsüla, ta takhangba agütsü.

Patil-i, "Leak asüba paper ji kong nungi aru? Shibai tama angu? Iba ya ajanga asalentong yanglur inyakba kuli sayur. Paper leak asüba osang prokba sülen anogo ka dang lirbo advertisement adoka kaketshirtem dang iba exam tanaben agishitsü atema class nung adentsü ajungshir. Coaching centres aser inyakim na tsüingda tesendaktep ya raksatsütsü nüngdak," ta metetdaksü.

Congress lenirisa paper leaks aser exam balala ketdangtsüa magitetba atema Union Education Minister, Dharmendra Pradhan-i menden nungi anentsüla, ta metetdaksü.

Iba campaign dak sendakba nung Congress-i August 1 nü yimti 28 nung aliba district collector offices kima longkak aitsü aser mezüingbuba shilem tembanga March 9 nü "Delhi Chalo" sentong agitsü.



June 25, 2026 nü Lucknow nung AAP national convenor, Arvind Kejriwal aser AAP MP Sanjay Singh nati Chaudhary Charan Singh International Airport nung osangbenertem den jembidang tangokba noksa nung angur. AAP lenir anati Ayodhya semdanga Ram tekülem kidang sarasadem.

2023 küm Maharashtra nung aluyimer 6,669 soseta asü: Minister

Mumbai, June 25 (Agencies): 2023 küm Maharashtra nung aluyimertem aser alu nung aayangertem 6,669 soseta asü, ta Brihostibarnü state assembly nung Relief & Rehabilitation Minister, Makrand Patil-i metetdaksü.

Assembly nung NCP MLA Dharamraobaba Atram-i asüingdangba langzüdang Patil-i, aluyimertem soseta asüba osang ya 2023 küm National Crime Records Bureau

(NCRB) indang report nungi lir, ta metetdaksü.

"Soseta asürtemji aluyimer 4,150 aser alu nung aayanger 2,519 liasü. Alu nung aayanger soseta asürtem rongnung parnok 77 bo tetsürtem liasü," ta pai metetdaksü.

Ano tanga tasüingdanga ka langzüdang minister-i, "Atangji alu nung aayanger 29 soseta asübabo iba list nungji densema mali," ta metetdaksü, ajisüaka pai iba dak sendakba osang tejangja memetetdaksü.



TIR YIMYIM YIMOBILEM (EDITRIAL)

DIMAPUR FRIDAY, JUNE (AAMI) 26, 2026

India Nungerbo Koda?

- Tangsen Lemtur

Tang ama alima nung asayamong tulutiba 'FIFA World Cup' nung India bo iba asaya nung shilem agitsü metemsür, aser iba atemaji aikati shisadanger. Atangji India nunga football asaya meimertem aser jangrartem jenti lir, ajisüaka World Cup nung shilem agitsüsa team kata (asayar 26) madoker. Tang alima nung nütsüng shilem 18 bo India nunger lir, ajisüaka World Cup nung shilem agitsüsa asayartem madoker! Taküm World Cup nung shilem agir linüktem rongnung nütsüng ishiba aliba linükji Curaçao lir; iba linük nung nütsüng 1.5 lakh dang lir aser nütsüng lakh 6 dang aliba Cabo Verde linükia World Cup nung shilem agidar, ajisüaka India ama nütsüng billion 1.47 (lakh 14,700) aliba linük nungi iba asayamong nung shilem agitsüsa team kata madoker. Nütsüng billion 1.47 aliba linük ka nungi alima sabang nung tanga linüktem den toktepa asayatsüsa football asayar mongin 26-a madokbaji tesasatsüka lir. Atangji India nungeri kanga sapuba asayaji cricket lir, saka iba linük nung football asayatsü jangrartema aika lir, anungji football asayartem mongin adokdaksütsüsa tamendakdak junga yanglutsüla saka yamaji meinyaker. Alima linüktemi football asayartem mongin aika adokdaksütsü atema inyakba mapang nung India nungbo All India Football Federation (AIFF) agi 'Football Federation of Bharat' (FFB) ta nüngja melentsü ang tongtibangba kümdaktsür. 2008 küm Asian Football Confederation (AFC) U-16 Championship nung India team-i Saudi Arabia madak takok ngua liasü aser Iraq den 'draw' asü. Tanü linük anajibo FIFA World Cup nung asayadar. Ibaji ajanga tangar linüktembo football asaya nung tejakleni aodang India bo tesülen ang atsüngzüka aluba kuli angur. Ano 2017 küm U-17 World Cup nung asayartem aika tang World Cup nung asayadar. Tang World Cup nung asayar Japan nungi Keito Nakamura aser Takefusa Kubo nunger den kasa jenjang nung asayar India nungertem-a aika liasü, ajisüaka parnokbo tesülen atsüngzükogo. Tesüiba küm ishika tsüngda Asia nung aliba linüktem aika football asaya nung kanga renlokogo saka India bo rajangba dang akümer. Mongintemi ashiba agi, iba asaya nung mongin akümtsü atema arrshi küm 15 nungi masü saka arrshi küm 5 asüdang nungi tenzüksüla. Japan nungbo coach temi 'Mission 2050' atemzüka 2050 küm tashi nungbo World Cup takok angutsü atema mangdang yur asalentong yanglua arrshi küm 5 asüdang nungi football asayatsü ajungshia tesayuba agütsür. Japan-i World Cup takok angutsü mangdang ayuba amajisa mesüaka India taruba küm 20-30 nungbo World Cup nung asayatsü, ta mangdang yur asalentong tajung yanglua inyakra asangsang ataloktsü akok. Ano külen asen lima sasep nung reprangdangra asenokisa iba asaya ya tejangraba südi ta bilemer. Yamai iba asaya kanga sapua reprangba apibo asenoki jangraba amaji karibo mongin kuma asayatetsüla ta bilemer. Küm pezü shia FIFA World Cup asayamong ajanga football asayatsü aika ajungmesor, yamaji taküm World Cup reprangba sülen lanur aikati iba asaya asentenshir asayatsü, ajisüaka iba tejangrabaji khen dang lirbo remsepa odaktsür; iba ya asenok dak aketba jakla ka lir ta bilemer. Tang football indang jembir dangashi tanga saisapong balala nunga asenok rongnung saisaponger mongin madoker. Ya kechi tai ajanga?, ta shisadangtsü nüngdaka kümogo. US, Canada aser Mexico nung ayongzüka World Cup asaya reprangdang yimten yimsüsürtem aser saisapongertemi asaya jangratema reprangba denji külemi tangar den medemdanga kanga shisadanga tangazüksü jenti akatsü.

OLEMSABANG

AO OSHI NUNG 'METAPHOR' ASER 'SIMILE' AMSHIYIM

~ Ms. Toshisangla, Asst. Professor FAC

(Yashi adok nungi...)

C. Temenünütsü keta amshibayim (humorous) Tat:

1. Pa yipden nungi shishitsübaji nashi scü nungi lungsang kentettsü asakba ama lir.
2. Pa mang nung waka menembaji tsunami ama sashir.
3. Tambusang tenükji süklep ka tarok.
4. Ni asentzü nung tzü wadagi.
5. La bangji oro ama telili.
6. La olaji kangrang ola mesüker.
7. Kü tenük tsüngsangdaki.
8. Kü nükküptsüji garitsüng ama taret lir.
9. Pa mitji tzü ama ajar.

Metaphor aser Simile ya nüngtugu Sangrojet aser Jilushi zülur William Shakespeare amalai aiben amshia angutsü tat: 'As you like it' Jilushi nung "Alima ya Jilushi sabang ka lir". T.Senka Ao -i 'Teronem Taku' yimdangjem nung Aremla tobur ajungba rajemdaktsütsü atema simile aser metaphor yamai amshia lir; "La tetsüngtepenji leplu entsü ama tsüksemtsüksemer", "La tebang mechiji yalem naro pongsen".

Metaphor tapu pezü indang terasa yamai

1. Standard Metaphor (Indang-indanga Medemdangba):

Iba metaphor yagi oset mesüra taküm aliba tsüngta meputepi aliba medemdanger aser x ji y ta ashir.

Tat: (a) La kü taküm tesangwa.

(b) Mapangji auür.

(c) Taküm alibaji teimla.

(d) O ji taküm.

2. Indirect or Implied Metaphor (Meküna Medemdangba):

Iba yimya nung ya metaphor jagi meputepba tapu ana tsüngta medemdanga sayur saka tapu ka jibo tenüng teta mashir.

Tat: (a) Tetsü jagi lar jala dak asanglokja meren. Yangi tetsüji azü den medemdanger saka oren nungji "azü" taji shia mali.

Tat: (b) Jala kiyi aoba anogo nung tebu tenibong nungi ayongnu ka tanemi yimzüka alu. Yangi tebu nüktzüja yongnu den medemdanger saka oren nungji "nüktzübo" shia mali.

Tat: (c) Longkongla temeli agi yimertem nem mim agütsü. Yangi Longkongla ya per den medemdanger saka per ta shia mali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bournemouth nung baptiba sentong ka agi



June 25, 2026: June 21 nü Bournemouth Beach nung tamangertem 1,200 shi adenshia Arogo 14 nungi züngsem tasenpurtem baptiba sentong nung denogo.

Arogoi 14-i ayongzüka agiba tanabuba sentongji taruba Amongnü agitsü.

Yaküm mezüng tzüymkümlen baptiba sentong ayongzüka agi aser iba sentong nungji Bournemouth, Christchurch aser Poole nungi nisung meyrjang ka dak tali aden.

Takümbo BCP Arogoi baptiba sentong ya hopta ana tsüngda anaben agitsü telemtetba agia liasü.

June 21 nü agiba sentong nungji nisung 43 bapti.

Baptirtem rongnung ka, Val Simon-i, "Tzüymkümlen nung baptiba sentong agitsü, ta osang angazükba mapang nung ni, iba ya ni asoshi lir ta bilema liasü. Iba sentong ajanga nüburttem ajungmesotsü ni sarasadema liasü," ta metetdaksü.

Yaküm July ita nung agiba baptiba sentong nung nisung 1,300 aden aser 92 baptia liasü.

June 21 nü agiba sentong nung Tsüngrem O jembidang Lansdowne Arogo nung pastor, Peter Baker-i, "Tzüymkümlen nung baptiba ya yimjak nung kuli sangdongba lir. Hon sentsü lisem aliba tzüymkümlen ya mile tenet lir. Iba ya Yisu dak amangba yimjak nung kulisüba lir. Iba ya ajanga tatok anguba, meshitetba, shidokba aser taküm tasen tenzükbä temaitsü sayur," ta ashi.

China nung Khristan Pastor kati lapokbaArogo shibangtsütsü

June 25, 2026: China nung Xinjiang Uyghur Autonomous Region nung aliba Uyghur Khristan pastor kati tenzükbä Arogo ka shibangtsütsüa akok, ta International Christian Concern (ICC)-i metetdaksü.

Pastor taküm lendongi maitsü atema ICC-i pastor tenüngji "Pastor A" ta amshir.

Xinjiang nung pastor A-i Uyghur Khristantem atema house church ka lapoka lir. Tesüiba ita ishika sorkar ketdangsertemi iba Arogoi özüng alema inyaker ta shia iba Arogo nung lenirtem amokmerena arudar.

ICC-i ashiba agi, ketdangsertemi Arogo dang Arogoi inyaksangshiba report tejangja agüjang aser June 25 tashi nung "compliance deposit" agüjang ta tuyua liasü.

Ketdangsertemi iba Arogo ya teti atema shibangtsütsü akok ta Arogo nung lenirtemi tsübur.

Ano külen June 29 nü iba Tenla ki bendoktsütsü ta amokmerena lir. Pastor A-i, par jabaso apu aser ketdangsertemi par jabaso dang pai Arogo nung shilem agiba dak sendakba asüngdangyaogo, ta ashi.

Par jabaso chiokogo, ajisüaka pa dang kidang nungi mayazüktü tuyuogo.

Ketdangsertemi Pastor A kinüngtsüa jaok aser yimsü dak sendakba sentongtem nung shilem magitsü atema kangshia nangzükdakja 'document' ka nung sign südaksü.

Ketdangsertemi Arogo nung lenirtem dak tenük kanga yokdar. Police-ia Arogo nung züngsemtem aika dang asüngdangyaogo.

Pastor A-i ashiba agi, ketdangsertemi Tenla kiji temzüng anema asüba lir, ta tai tongloktür anungji Tenla kiji bendoktsütsüa akok.

Arogo lenirtemisa, tekülem sentongtem nokdangogo aser sorkari Arogo kiojen mita repranger, ta metetdaksü.

China Tir Xi Jinping yimsüsüba kübok linük tesem ajaklen Khristantem anema tenokdangba balala agütsür, aser tawa Uyghur nunger Khristantem anema inyakba kanga bulua akümer.

Uyghur nungertem ya teimbaka Muslim Turkic lisopurtem lir aser parnok Xinjiang nung alir. Parnok oshi aser sobalibaji Han Chinese majority dang nungi khenyongi balaka.

Uyghur nungertem ya teimbaka Muslim nungertem lir, ajisüaka aika Khristan yimsü dangi meyipogo. Uyghur nungertemji Muslim süaka mesüra Khristan süaka parnok ajaki timtem kanga ajurur.

Tesüiba küm 10 tsüngda China sorkari Uyghur nungertem aika tepsetogo aser tang Uyghur nunger million 1 shi pua lir.

2021 küm U.S. Department of State-i, China sorkari Xinjiang nung Uyghur nungertem aser Muslim minority teloktem aika tepseter aser ketdangsertemi meimchir temeden anema inyaker, ta metetdakja liasü.

Chhattisgarh nung Sadrapal yimdak telok kati Khristantem amak



Chhattisgarh state kübok Sadrapal yimdak telok kati Tenla kidang Khristantem amakba mapang yiruba Khristantem hospital-i anir aodang tangokba noksa nung angur.

June 25, 2026: Taoba Amongnü Chhattisgarh state kübok Sadrapal yimdak telok kati Tenla kidang Khristantem amakba atema onoki tebilemtsü katsür, ta Christian Solidarity Worldwide (CSW)-i metetdaksü.

June 21 anepdang Sadrapal yimdak Khristan 60 tekülem sentong nung adenba mapang nung yimdaklir 100 shi Tenla kidang jagi arua liasü.

Lokti jagi Khristantem dang Khristan yimsü tokjang ta takhangba agütsü saka Khristantemi memelungba agi parnok dak azük.

Khristantem rongnung tanurtem aser mashisa tetsütem-a densema liasü.

Iba tatalokba nung nisung shinga masü, ajisüaka aika yiruogo.

CSW-i ashiba agi, mezüngbo hospital nung ketdangsertemi Khristantem nem treatment agütsütsü memelung, kechiyong police-i iba tatalokba bushisüngdangtsü memelungi liasü.

Anogo ana lir sülen ang police-i bushisüngdang tenzükbä aser nisung 12 apu.

Osang angazükba agi, joko mapang tatsüka iba yimdakji yimdaklirtemi Khristantem kanga sendoka aruogo.

Khristantem nem yimdak tzübo nungi tzü metadaksü.

Khristan melungtet telok Open Doors-i ashiba agi, Chhattisgarh state sorkari yimsü balala amangertem tsüngda tesünep nung alitsü atema state nung house churches nokdangogo.

Iba dak alia state aika nung anti-conversion özüngtem benoka Khristantem nem tiyazü nung tai tonglokja apur.

CSW nung Advocacy Director, Anna Lee Stangl-i, "Tang tesüa Chhattisgarh nung Khristantem amakba osang angashia CSW-i tebilemtsü katsür. Talisa hospital kati yirua aliba Khristantem nem medical treatment agütsütsü memelungba ya taoksatsüka lir," ta ashi.

"Onoki tim ketdangsertem dang item tatalokba ya jungjunga bushisüngdangtsü aser aibelenertem nem tapet temerenshi agütsütsü akhanger," ta metetdaksü.

Stangl-isa, "Onoki özüng benokba ketdangsertem danga item Khristantem nem tangsa security agüjang ta akhanger," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Yimtsüing**

(n) yimten ka kübok nübortem aliba yim (village)

* Asenok yimtsüing shia nung nashi metsütsüla.

Yimtsürok

(n) shisatsü teküprak, tesüsü (mean minded person)

* Yimtsürok nisungi tangar den putepa melitetter.

OLONG PAITEP # 7546

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüingpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiding - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7545 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

Manmao-Changlang highway nung tesem aika raksaogo**Itanagar, Aami/June 25**

(Agencies): Tzüinglu kanga sashia aruba ajanga Arunachal Pradesh kübok tesem aika nung teraksatsüba adokdaksüogo, aser Manmao aser Changlang na sendaktepba highway kübok tesem aika nung lenmang raksaba sülen senzügenpong nung tetsükdaksü adokogo.

Anogo ishika tzüinglu kanga sashia aruba sülen Changlang district kübok tesem balala nung anentsü aser tzüishi aluba ajanga lenmang apungerogo. Ketdangsürtemi ashiba agi, highway kübok tesem aika nung lenmang raksaba ajanga gari senzügenpong mejungi kümogo.

Lenmang chirepba ajanga district nung nüburtem senzügenpong, tenüingdakba oset shibelenba aser emergency service tem senzügenpong nung tetsükdaksü adokogo. Ketdangsürtemi

senzügenpongertem dang lenmang yangluba mapang iba tesem takok tashi paitoktsü metetdaksüogo.

Arunachal Pradesh kübok tzüinglu kanga sashia aruba ajanga tesem aika nung lenmang raksar senzügenpong nung tetsükdaksü adokogo. Anentsüh aser tzüimetsüing aluba ajanga infrastructure tem raksatsüba den highway tem nokdangogo aser state kübok kinük nung aliba tesemtem kar tesendaktep makai kümogo.

Tensa asadanga alitsü atema district ketdangsürtem aser disaster management team tem yokogo aser teyari agütsüba maparen balala tenzükogo. Manmao-Changlang lenmang raksar aliba ya engineer tem asadangdar aser lenmang takaratiba nung yanglua senzügenpong tenzükdaksü atema jenjang agidar.

Manipur: Security forces temi prangbong injang aika ngutetogo

Imphal, Aami/June 25 (Agencies): Security force temi Manipur kübok Kangpokpi district nung tesem balala meita aoba mapang prangbong injang aika ngutetogo, ta police-i Brehostibarnü metetdaksü.

Sepaitem ngutetba prangbong injang aser hadirtem rongnung 5.56 mm Excalibur rifle ka, single-barrel rifles ti, improvised mortars pezü, Under Barrel Grenade Launcher (UBGL) ka, lathods pongu, injang balala 236, magizen ana aser Baofeng communication handset ka densema lir.

District nung tang tensa mejungi aliba mapang aser telungpurtem aser ozüing alema prangbong injang belenshiba nokdangtsü atema security force temi jenjang agia aliba mapang item hadirtem ya ngutetogo.

Kasa mapang nung Naga nung lokti tentet ana; Foothills Naga Coordination Committee (FNCC) aser Naga People's Organisation (NPO)

nati CRPF indang CoBRA unit aser Assam Rifles nati Kangpokpi district kübok Leilon Vaiphei tesem nung joint operation benoka inyakba aitsüogo.

Lokti tentet ana yagi ashiba agi, meita aoba mapang Kuki nung telungpur 100 shi longbang, saka aputsü melena parnok chioka liasü. Naga nung 18 pur aoba aser tangar trok tepsetba dak sendaka alirtem aputsü atema iba meita aoba sentong ya benoka inyaka liasü.

FNCC-i ashiba agi, meita aoba sentong koba aibelena alirtem aputsü nükjiding nung benoka inyak, iba ya bendanga agütsüdaksütsü atema sensaksemba sentong ka dang aküm. Parnokisa, inyakyim nung politics aiba sülen telungpurtem longbanger liaka sepaitem atsüingina liasü, ta ashi.

FNCC-isa, KNF(P), UKNA aser KRA nungi telungpurtem ya mepui KNF(P) Ebenezer Camp-i aotsü temelaba agüja liasü, ta ashi.

Iba inyakyim agi temlung mesüi committee-i, akoksar alirtem atema ochi obendang khanga liasü. Parnokisa, telungpurtem anema security operation balala benoka inyakba ya koba tashi ka takok ngua odor, iba indang ashishia liasü.

NPO-ia, Naga nung trok tepsetba dak sendakba nung shinga mapuba indang ashishio. Parnoki ashiba agi, tasüangtem maneni JNIMS mortuary nung yua lir, kechiyong ken o tang bushisüingdang südar.

Maneni NPO-i, June 24 nü Namdilong-Kanglatongbi nung longkak aiterem dak tashiyim amshiba aitsüogo aser iba amala inyakyim maneni benoka inyakra Naga nung lokti tentettemi longkak aitba sentong tali benoka inyaksü, ta shio.

Lokti tentet anapronglai ketdangsürtem dang asürtem nem ochi obendang agütsütsü aser azütokshi lendong atalokdaksürtem anema jenjang tapet agütsü takhangba agütsüogo.



गृह मंत्रालय
भारत
सरकार

**CENSUS 2027 NAGALAND****SELF - ENUMERATION**

ENDS ON
30 JUNE 2026



ENLIST YOUR
HOUSEHOLD TODAY



**One Household ,
One Entry**



**Takes only
2-3 mins**



**Simple, Secure
& Digital**

**Our Census
Our Development**

Scan for more details

Enlist your
household at your
**Usual Place of
Residence**, and
not elsewhere

Visit Today: se.census.gov.in



CensusIndia2027

GOVERNMENT OF NAGALAND

DIRECTORATE OF SCHOOL EDUCATION

KOHIMA : NAGALAND

NO. ED/NFTW-CT-1/2022/245

Dated Kohima, the 25th June 2026

NOTIFICATION

In pursuance of Ministry of Education, Department of School Education & Literacy D.O. No.1-13/2025-NAT dated 15th June 2026, the web portal for online self-nomination by teachers is open from 15-06-2026 and last date of submission is 10-07-2026. The condition of eligibility for consideration of National Teachers Award is only regular Teachers and Heads of Schools with minimum ten years of services are eligible.

In this regard, teachers who have contributed for the improvement of quality of education through their commitment and industry and also enriched the lives of their students can submit self-nominate themselves before the prescribed last date of submission. Further, details may be obtained from the web portal <https://nationalawardstoteachers.education.gov.in>

For State and District Teachers' Award, the details may be Obtained from the Departments website <https://education.nagaland.gov.in/>

Hence, all DEOs/Sr. SDEOs/SDEOs are requested to ensure wide publicity in their respective jurisdictions.

(Shashank Pratap Singh) IAS
Principal Director

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA

Website: www.highereducation.nagaland.gov.in

Email: dirhighedu@gmail.com

NO.HED/HOST/1/2016

Dated: Kohima, the 25thJune 2026

NOTIFICATION

This is to inform all the proprietors/wardens of hostels registered under the Directorate of Higher Education that hostel forms for applicants of Post-Matric Scholarship Scheme will be issued from this Office w.e.f. 1st - 31st July 2026.

The Directorate shall also issue the Hostel Eligibility Certificates (HECs) to hostels that have applied for new registration/renewal/changes and have been inspected and found satisfactory.

All hostel proprietors/wardens are required to bring the following documents while collecting the hostel forms:

- The Original Hostel Eligibility Certificate (HEC).
- A No Objection Certificate (NOC) from the Institutions where the hostellers are studying at the time of collecting hostel forms. NOC format can be downloaded from the given website <https://highereducation.nagaland.gov.in>.
- Hostel admission register with recent passport-size photographs affixed against the name of the students.

Sd/-
Director
Higher Education
Nagaland: Kohima

Iran rara mechi Trump aser Republican senator asatep

Washington, Aami/June 25 (Agencies): Bodhbarnü külem Republicans tem den senden ka amendang Iran rara mechi US Tir Donald Trump kanga sashia aitsü, aser mapang tatsüka lir pa indang administration-i Congress dang iba rara atema agütsütsü asoshi sen dollars billion aika meshia liasü.

Iba senden nung adener Republican züngsem kari ashiba agi, Trump ya Senator Bill Cassidy den asatep, shibai Iran nem senotsü teyari agütsü saka Trump-i rara tenzükdang nükjidadong sangdongba mataloki taoba hopta framework deal ka zülutepba indang rasaa ashitsü nüngdaker ta shia liasü.

"Onok dang shia aliba dang nungi tali America nüburtemi metettsü nüngdaker. Aji mangur, aser nia tejangja memetet, ajisüaka onok dang ashiba ama aor südi," ta Cassidy-i osangbener tem dang ashi.

Mapang tatsüka lir tir peladaksütsü meranger ama,

Senate indang Republican lenirtemi aonung menur süaka Iran nung raraba tembangtsü asoshi pangzüng ka yanglua aliba nokdangtsü atema vote agitepa liasü.

Senate nung party sasep nung ama vote ya 50 - 47 agütsü, koba May ita war powers resolution yanglua aliba nokdangtsü atema liasü.

"Iba vote yagi Iran dang tekumandangtsü ashir," ta Trump-i Bodhbar aonung menur vote agitepba sülen social media nung ashi, ajisüaka iba vote yagi taoba mapang vote agitepa aliba nung mokongshir.

Bodhbar aonung chiyongba mapang Trump'er party züngsem ka den asatepba ajanga November elections agitsü lia rara ajanga tir nem tetsükdaktsü agütsüba sayur.

America nunger nisung pezü nungi kati dang rara nung rongsen laluba tajangzük lir ta ashir, aser Trump indang approval rating tang tajemtiba

nung lir.

Tan ita House of Representatives nung pangzüng agizüka aliba den balaka ano Senate nung Trump dang rara tembangtsü tuyua vote agiteper anogo ka lir iba ya atalok.

Opposition Democrats den külemi Republican züngsem pezüi iba vote bhukuma agütsür rongnung Cassidy ya ka liasü.

Trump-i Cassidy den asatepba indang mashi, shiba taküm primary election ka nung Trump-i bhukumba challenger kati atsüngdoka liasü. Pai mapang tatsüka lir Senate aitsü.

Ghonda ishika lir administration-i Congress dang rara sentsü menoktsü atema sen \$70 billion meshia liasü, koba US military budget sen \$867 billion den bendenloksemba alitsü.

Bodhbar nikongdang X nung post ka nung Cassidy-i Vice President JD Vance aser Special Envoy Steve Witkoff dang Iran indang junga rasaa ashiba atema pelar, ta shia liasü.

Venezuela menoknok nung nisung 164 asü, 971 yiru

Caracas, Aami/June 25 (Agencies): Venezuela nung menoknok tesashi anaben anokba sülen nisung 164 asü aser 971 yiru, ta Acting President Delcy Rodriguez-i Brehostibarnü ashi.

Bodhbar nikongdang menoknok magnitude 7.2 aser 7.5 anokba ya Venezuela nung century ka dak tema nung tesashitiba rongnung ka alitsü, koba region ajunga nungi meteta liasü. Brazil linük kübok Amazon tashinung oa nüburtem kidang nungi ainshi, koba Venezuela yimtiba Caracas nungi mile 1,050 shi pilar lir.

State TV nung video sayuba nung tanur asem aoyi agi sünger süaka takum La Guaira state nung ki chirepa alidak nungi atsüteta liasü, koba "disaster zone" ta Rodriguez-i ashi.

Ketdangsür temi rescue teams tem linük tesem balala nungi La Guaira bushia anir arur ta Rodriguez-i ashi, koba Caracas north tsütsü tzükum nung lir. Ki o jen laoba agi nembanger süaka masü lir südi ta bilemba nisungtem kumzüksü asoshi anü lia arsanga inyaker, ta lai ashi.

"Yangji ki tulu aika lao... aser onkoki nisung takum kumzüksün asoshi yangji rescue operations agiba mapang lir," ta Rodriguez-i ashi.

Rodríguez-i private sector dang rescue operation atema ki o jen yangluba nung amshiba oset tulutem agütsütsü ayongzük aser United Nations-i melaba search and rescue teams tem yariteptsü asoshi Venezuela-i arutar ta ashi.

Menoknok agi raksatsüba mozüki aser ki yanglushitsü atema sorkari sen \$200 million reconstruction fund lapokogo aser economy aser finance minister tem dang itemji ketdangsütsü tuyuogo, ta lai ashi.

Venezuela ya 'fault lines' ishika anasa lir, saka South American aser Caribbean plates nung tangtepa aliba ajanga tanga Latin America tesemtem nung ama masü Venezuela nung menonkon tesashi anokba kangabo mali.

Rodríguez-i Bodhbar aonung menur linük den jembidang 'state of emergency' sangdong aser menoknok najanga states aika nung teraksa bener arutsüogo ta shia liasü.

Interior Minister Diosdado Cabello-i nüburtem dang kilong nung malitsü ayongzük aser nisung aika yimtung nung ghonda aika liasü. Aika gari anena alidak, subway stations aser nüburtemi amshiba tesemtem nung ammag süyidaktsü.

Caracas shilem kar nung power aser cellphone coverage sama aser menoknok ajanga

Simón Bolívar International Airport raksatsü aser shibangogo, ta Rodriguez-i ashi, koba linük indang airport tulutiba alitsü.

Caracas nung subway services athi aser natural gas shibang, ta lai ashi. Ministry of Education-i anogo ishika class magitsü ta sangdongogo aser school ki kar nüburtem anisüngzükdak aser donation centers ama amshitsü.

Venezuela shilem kar nung cellphone signal maliba ajanga kibong aika shisabolu nung lir, aser ano nisung 7.7 million dak tema linük yutsür aoba meyipa meshilangi linük nung kinunger atema bilemer.

U.S. Geological Survey-i ashiba agi, mezüngbuba menoknok magnitude 7.2 yagi Caracas antiölen kilometer 170 shi pilar Caribbean tzükum nung aliba Moron anüölen kongshi. Iba ya ali telung kilometer 22 shi lur tenzüka liasü.

Minute ka lir 7.5 magnitude menoknok ya ali telung kilometer 10 shi lur anok aser Moron southwest tsütsü kilometers 16 shi pilar epicenter liasü.

Iba lendong atalokba sülen linük balala nungi teyari agütsütsü mulunga aliba lemsatepogo.

U.S. Secretary of State Rubio-i Brehostibarnep X nung, United States-i search and rescue teams, medical resources aser humanitarian assistance Venezuela dangi yoker ta ashi.

US mitkari military operation ka nung Venezuela tir Nicolas Maduro pua United State nung bener oa lir, aser iba sülen Rodriguez ta acting president akum. Lai US Tir Donald Trump dang pelaba ashi aser X post ka nung Rubio den phone ajanga jembiogo ta shia liasü.

Ecuador-i humanitarian aid agütsütsü tuyuogo aser Qatar, Mexico aser El Salvador nungia rescue personnel yokogo ta Rodriguez-i ashi.

"Onok ajaki nenok asoshi sarasademtsür aser nenok den nokdaka lir. Tashi ita liang, Venezuela," ta El Salvador Tir Nayib Bukele-i X nung zülü ka post asü.

Brazil indang Amazon kübok Manaus, Belem aser Macapa tesemtem nung ki aika azüngtet, ta TV Globo ajanga ashi. Menoknok ya Colombia indang Caribbean aser northeast region tem nungia meteta liasü.

Venezuela nung menoknok kangabo manoker, saka Mexico aser Chile densema Pacific tzükum nung teti anoker, koba Ring of Fire ta ajaba 'seismically active tectonic belt' nung lir aser menoknok shilem 90 iba tesem nungi tenzüker ta USGS-i ashir.

FIFA WC: South Africa, Mexico, Brazil knockout round-i iogo



Aami/June 25, 2026

(Agencies): Brehostibarnü FIFA World Cup mezüngbuba round tatembangbuba asaya nung South Africa-i goal 1-0 agi South Korea koka tang mezüngbuba knockout round tongtetogo.

Asaya tanabuba shilem nung Thapelo Maseko-i South Africa atema goal ka idaktsüba sülen asayar, coach aser South Africa nunger pusemtem metyirejang aika pelatapa liasü.

South Korea asoshi iba asaya maokba ya tezüdangtsüka liasü. Parnok best third-placed team nung densema knockout round-i aitsü maitsü aji atatsüsa kümogo.

Mexico den mezüngbuba asaya makokba sülen South Africa-i iba asaya akoktsü aikatibo mimlai liasü, saka parnoki tetenzük nungi asaya akoktsü nükjidong yur kanga meranga asaya aser takok ngutetogo.

Group A tanga asaya ka nung Mexico-i goal 3-0 agi Czechia koka par telok nung parnok temaba jenjang nung tembangogo.

Asaya nung Mexico atema Luis Chávez, Julián Quiñones aser Álvaro Fidalgo nungeri goal

kaka idakja liasü. Kasa mapang nung goalkeeper Guillermo Ochoa-a iba asaya nung asaya aser pa ya FIFA World Cup puti otsü nung iba asayamung trok nung asayaba asayar tasembuba kümogo.

Czechia pur iba asaya akoktsü nüngdaka asaya tenzük aser parnoki kanga meranga asaya aser goal idaktsütsü atema maongka dena ngutetogo, saka item maongkatem magitetba ajanga parnok tamakoker rongnung aden.

Brehostibarnü Miami Stadium nung Brazil-i mezüngbuba round tatembangbuba asaya nung Scotland goal 3-0 agi akokba sülen parnok Group C nung temaba jenjangi tua knockout round atema qualify süogo.

Asaya nung Vinicius junior-i goal ana idaktsü aser Matheus Cunha-ia goal ka idakja liasü. Brazil pur tang agi 12benbuba FIFA WC nung parnok asayaba Group nung temaba jenjang nung tembangogo.

Kasa mapang nung Vini ya 2002 küm Rivaldo aser Ronaldo na sülen tebur World Cup asem nung goal idaktsüba Brazil nunger asayar mezüngbuba kümogo. Iba list nung pa Romario aser

Jairzinho nunger den densemogo.

Vinicius-i Morocco den mezüngbuba asaya nung Brazil atema goal ka idakja iba asaya draw nung tembang aser iba sülen Haiti goal 3-0 agi akokba asaya nunga goal idakja liasü. Real Madrid forward yagi Scotland den asaya nunga goal idaktsüba sülen Brazil pur group asaya ajak nung pai goal kakabosa idaktsüogo.

Par telok nungi Morocco tanabuba jenjang nung tembanga parnoka knockout round atema qualify süogo. Parnoki Haiti goal 4-2 agi koka liasü.

Maneni Group B nung Switzerland-i goal 2-1 agi Canada akokba sülen parnok par telok nung temaba jenjang nung tembanga qualify süogo, aser Canada tanabuba jenjang nung lir.

Asaya nung Switzerland atema mezüngbuba goal ya Ruben Vargas-i idaktsü aser iba sülen minute 57buba nung Johan Manzambi-i tanabuba goal idakja liasü.

Asaya nung Canada atema goal ka ya David-i minute 76buba nung idaktsü, saka parnoki tanabuba goal meyokteti asaya makok.

Ano tanga asaya ka nung Bosnia and Herzegovina-i goal 3-1 agi Qatar koka parnok tasembuba jenjang nung tembangogo aser knockouts stage-i aitsü atema timla terabo lir.

Kerim Alajbegovic-i minute 29buba nung Bosnia atema mezüngbuba goal idaktsü aser iba sülen Mahmud Abunada-i own goal ka idakja liasü.

Asaya tanabuba shilem tembangtsü lia Hasan Al Haidos-i Qatar atema goal ka idaktsü, saka minute 80buba nung Ermin Mahmic-i Bosnia atema tasembuba goal idakja parnoki asaya akok.

Assim Madibo nem asaya pongu atema tenokdangba agütsü



Aami/June 26, 2026

(Agencies): World Cup nung Canada nunger asayar Ismael Kone tetsüng sükdangtsüba sülen Qatar nunger asayar Assim Madibo nem Bodhbarnü asaya pongu atema tenokdangba agütsüogo.

Taoba Brehostibarnü Vancouver nung Canada-i goal 6-0 agi Qatar akokba asaya nung iba tatalokba sülen Madibo nem red card ka agüja liasü. Pai kanga mejungi foul menaba atema iba temerenshi agütsüogo, ta FIFA

disciplinary committee-i ashiba den pai temepishiba benoktetsü, ta ashi.

Kone shiba ground nungi stretcher nung bener tugua liasü, pa tetsüng tabelen nung tibia aser fibula sükdangba atema sürgery agiogo.

Asaya tenzük minute 51buba nung Madibo-i tesülen nungi pa tetsüng nung metsüba sülen pa tetsüng nung amer longdak aser pa anasa aliba asayartemi pa kanga mejungi yirur alitsü ta bilema liasü.

Asaya tembangba sülen Madibo kanga mepelai liasü aser pai Kone dang tatok meshiogo.

"Shirnokisa aria bilema kü den tongtepratepogo aser sarasadem nung bilemtetogo, nenok ajak dang kanga pelar," ta Kone-i mapang tatsüka lir Instagram ajanga ashi.

Iba ya FIFA-i World Cup nung temerenshi tulutiba agütsüba

masü. Brazil nung 2014 küm World Cup asayaba mapang Italy nunger defender Giorgio Chiellini dak angoba sülen Uruguay nunger striker Luis Suarez nem asaya teku aser ita pezü football asaya dak sendakba nung kecha shilem magitsü atema tenokdangba agütsü. Ano 1994 World Cup nung Italy nunger defender Mauro Tassotti-i Spain nunger striker Luis Enrique dak tekatsüla agi asetba sülen pa nema asaya ti atema tenokdangba agüja liasü.

Bodhbarnü Switzerland-i goal 2-1 agi Canada koka parnok World Cup knockout stage-i iogo, aser Canada-a par telok nungi tanabuba jenjang nung tembanga knockout stage-i iogo.

Switzerland team round of 32 asaya atema Vancouver nung dang anenzüka atatsü aser Canada team taruba asaya atema Los Angeles-i aotsü.

FIFA-i All Nepal Football Association suspend sütsü

Aami/June 25, 2026

(Agencies): All Nepal Football Association (ANFA) inyakyim nung third-party kati jushiba sülen FIFA-i ANFA suspend sütsüogo.

Iba telemtetba ya June 24 nü benokogo aser iba ajanga Nepali football tetsükdaktsü tulu adokogo. FIFA inyakyim nung member associations ajak sorkar, court aser yimden yimsüsüba lokti tentettem densema telok kechia minprong mesüi sadem sadema inyaksangshitsüla ta shia lir. FIFA-i ashiba agi, ANFA-i iba tetuyuba sülen tashi anga manidak anungji parnok suspend sütsüogo.

FIFA official sangdong ka ajanga ashiba agi, temzüng ozük kübok Articles 14 aser 16 dak ajemdaker iba jenjang agiogo, koba member association tem tinyaktsü aser inyakyim sülen tashi anga manidakra merenshitsu dak sendaka lir.

"Council Bureau-i FIFA Statutes article 14 paragraphs 1(i) aser 3 dak ajemdaker third party kati inyakyim nung jushia FIFA Statutes anema jenjang agiba ajanga All Nepal Football Association suspend sütsüta telemtetba agiogo," ta FIFA sangdong ajanga metetdaksü.

"June 24 nü nungi tenzüka ANFA membership temeden maka kümogo, koba FIFA

Statutes article 13 nung rasa shia lir. ANFA representative aser club team tem iba tenokdangba ya magintsü tashi international tetoktepbatem nung shilem magitetsü," ta kasa sangdong ajanga metetdaksü.

Tenokdangba agütsüba sülen ANFA membership temeden ajak maka kümogo. Nepal national team aser club tem tenokdangba agütsür aliba magin tashi FIFA mesüra AFC asayamungtem nung shilem magitetsü. Iba tenokdangba agütsüba ajanga FIFA aser AFC nati teyari agütsüba development grants, training programmes, educational course tem nungi ANFA aser parnok ketdangsürtem agina atatsü.

Maneni FIFA-i member association aser affiliated body tem dang ANFA nem tenokdangba agütsür aliba mapang parnok den saisapong kecha nunga shilem magitsü mesüra official tongtepratep masütsü tetuyuba agütsüogo.

Tenokdangba tesashi agütsür liaka FIFA-i ashiba agi, iba tenokdangba ya teti asoshi masü. FIFA Council Bureau mesüra FIFA Council-i, ken o dang bentetra taruba FIFA Congress magi tsüngda tenokdangba agütsür aliba ya mashi mapang ka nung agintetsü.

India nung asoba asayar Jai Mundra Ireland squad nungzüngokogo

Aami/June 26, 2026

(Agencies): India nunger asoba bowling all-rounder Jai Mundra, Ireland tenüng nung asayatsü atema jaokogo. Pa India den taruba T20I asayamung atema national squad nung züngoksemogo.

Mundra ya Rajasthan kübok Tonk district nungi lir, aser pa shimba ajanga par kinunger aser par jila nung alirtem kanga pelatepdar. Mundra ya India den T20I ana atema asayar 14 shimba nung züngoksema lir, aser pa pa asoba linük den international jenjang nung mezüngbuba asaya akok.

Mundra ya 2021 küm student visa bener M.Tech azüingi ao. Pa azüngba mapanga maneni cricket asaya liasü aser tanem tanemi asayayonga tur tang linük team nung züngoksemogo. 2025 küm Irish citizenship agizükba sülen pai kanga junga asayaba ajanga asayar shimertemi pa jangja aküm aser tang national team nung züngoksemogo.

India team Ireland nung oa June 26 aser 28 nü Belfast kübok Stormont Cricket Ground nung T20I ana asayatsü. Iba asayamung nung India team tang mezüngbuba Shreyas Iyer lenisüba nung asayatsü aser Ireland team ya Lorcan Tucker lenisüba nung asayatsü.

India Squad: Shreyas Iyer (Captain), Abhishek Sharma, Sanju Samson, Ishan Kishan, Shivam Dube, Tilak Varma (Vice-Captain), Axar Patel, Washington Sundar, Varun Chakravarthy, Ravi Bishnoi, Harshit Rana, Arshdeep Singh, Prince Yadav, Vaibhav Sooryavanshi, Suryansh Shedge (replaced injured Nitish Kumar Reddy).

Ireland Squad: Lorcan Tucker (Captain), Ross Adair, Ben Calitz, Gareth Delany, George Dockrell, Stephen Doheny, Matthew Humphreys, Gavin Hoey, Matthew Hollard, Liam McCarthy, Jai Mundra, Harry Tector, Tim Tector, Reuben Wilson.

BILEMDANGANG

"Kar tilutsü nungang na jangrademra nü tebilemdangba meshidak ta metetang."